



Indgået

25 SEP. 2017.

NAMMINERSORLUTIK OQARTUSSAT
GRØNLANDS SELVSTYRE
INATSISARTUT ALLATTOQARFIAT
BUREAU FOR INATSISARTUT
BOX 1060 - 3900 NUUK

Inatsisartuni ilaasortaq Villy Olsvig
Inuit Ataqaatigiit
/ Maani

Attaveqaatit sanaartornerlu pillugit § 37 naapertorlugu apeqquteqaammut 2017-196-imut akissut

22-09-2017
Sags nr.: 2017 - 17984
Dok. nr. 23443779

Asasara Villy Olsvig

Attaveqaatit sanaartornerlu pillugit Inatsisartut suleriaasianni § 37 naapertorlugu apeqquteqaatinnut qutsavigaakkut. Apeqqutit matuma kinguliani issuarneqarput, akissuteqaatinik malitseqartinneqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

1. Ilulissat ukiorpasuarini talittarfeqarnikkut ajornartorsiuteqarput, misissueqqissaarsinnaanermut aningaasanut inatsisissakkut aningaasaliisoqalersaarnarluni?

AKISSUT: Naalakkersuisut Ilulissani talittarfeqarnikkut unammilligassaqaarnerat eqqumaffigaat. Ilaatigut Qaasuitsup Kommunian peqatigalugu pissutsit qanoq iliorluni pitsaanerulersinneqarsinnaanersut ingerlaavartumik oqaluuserineqarpoq. Kingullermik suliamik, sinersorlutik takornarianut niuffiusinnaasumik sananissaq pillugu pilersaarusiortoqarpoq. Taannalu aatsaat sumiiffissaa ilusissaalu inaarutaasumik aalajangerneqareerpata sananeqassaaq, ikaartarfiullu taamaattup inissisimaffissaa pillugu suli Qaasuitsup Kommunian oqaloqatigineqarpoq. Aningaasartuutit Aningaasanut Inatsimmi konto pingaarneq 87.73.12 Umiarsualivinnut talittarfinnullu aningaasaliissutit aqqutigalugu akilerneqarnissaat naatsorsuutigineqarpoq. Kontomi tassani talittarfinnut Namminersorlutik Oqartussanit pigineqartunut aningaasaleeqqinnissamut ineriartortitsinissamullu ukiumut 25 mio. koruunit missaat immikkoortinneqarput.

Tamatuma saniatigut Qaasuitsup Kommunianut saaffiginnissasutit siunnersuutigisinnaavara, kommunit talittarfeqarfinni, kommuninit pigineqartuni ineriartortitsinissamut akisussaasuummata.

2. Ilulissat eqqaani talittarfiusinnaasutut takorloorneqartartumut mittarfissaaq sunniuteqassanerpa?

AKISSUT: Aap, umiarsualivimmi mittarfimmilu atorlut akornanni ataqaatigiissaarinissap qulakkeerneqarnissaa Naalakkersuisut eqqumaffigaat, Ilulissanut takornariat amerlinerat umiarsualivimmi taamatullu mittarfimmi angallanermut sunniuteqartussaammata. Tamanna tunngavigalugu Naalakkersuisut immikkoortumut pilersaarutit suliaqarput, maannarpiq umiarsualivinnut silaannakkullu angallanermut pilersaarutit inaarsarneqarlutik. Immikkoortumut pilersaarutit naammassineqariarpata erngerlunga tamanut ammasumik saqqummiussinissara naatsorsuutigaara.

3. Takornariarpassuit tikeralersinnaaneri takorloorneqarsinnaalluarput, taakkulu amerlanerussuteqarluartut angallatinik

kiffartuunneqaqqittarunarmata, qanoq aaqqiisoqalersaarpa?

AKISSUT: Matuma siuliani akissummi allaaserineqartutut maannarpiaq umiarsualiviup pioreersup avataani takornarianut niuffiusinnaasumik atortunik sananissamik suliamik suliaqartoqarpoq. Qaasuitsup Kommuniata Zionip oqaluffiata ataanut (Kirkebugten-imi) inissiinissaq siunnersuutigineqartoq kissaatiginngilaa, kisiannili umiarsualivimmut pioreersumut inissiinissaq kissaatigalugu.

Namminersorlutik Oqartussat umiarsualiveqarneq pillugu siunnersuisartuata umiarsualivimmi pioreersut ilaneqarnissaat inassutigingilaat, ullumikkut atuisinnaasut inissaqartinneqartut sinernerqareersimammata. Tamanna tunngavigalugu niuffigineqartarsinnaasup inissisimaffissaa inaarutaasoq pillugu Qaasuitsup Kommuniata oqaloqatigineqarnera ingerlateqqinneqarpoq.

4. Qasigianguani talittarfiup sukumiinerusumik misissuiffigineqarnissaanut (tilstandsrapport)-imik siunnerfeqarluni aningaasanut inatsisikkut immikkoortitsisoqalersaarnerluni?

AKISSUT: Umiarsualiviit Namminersorlutik Oqartussanit pigineqartut ingerlaavartumik misissuiffigineqarput. Kalaallit Nunaanni umiarsualiviit nunap immikkoortuinut tallimanut agguagaapput, nunallu immikkoortuani ataatsimi ukiumoortumik qanoq inneranik nalunaarsuiffigineqartarpoq. Taamaalilluni ukiut tallimat ingerlanerini umiarsualiviit tamarmik misissorneqarsimasussaapput. Misissuineq qanoq innermik naliliinermik inerineqartarpoq, iluarsaattariallilu nassaarineqartut tullerijaarneqartarput.

Kingullermik 2015-imi Qasigianguani umiarsualiviup pitsaassusaanik nalunaarsuisoqarpoq. Pitsaassutsimik nalunaarsuinerit tunngavigalugit iluarsaassinerit pitsanngorsaanerillu maannarpiaq ingerlanneqarput, taakkulu 2017-imi ukiap ingerlanerani naammassineqarnissaat naatsorsuutigineqarpoq.

2017-imi aasakkut Qasigianguani imarpik ikaarlugu umiarsuarnut talittarfik annertuumik ajoquserpoq. Tamatuma kingorna imarpik ikaarlugu umiarsuarnut talittarfik misissorneqarpoq, maannalu iluarsagassat suliarineqarnissaat aallarnisarneqarluni. Ajoqusermerit 2018-imi sikueriarpat iluarsineqarnissaat naatsorsuutigineqarpoq.

5. Ilinniartut najugaqarfii Aasianni Niels Egede-p aqqusernaniittunut aningaasanut inatsisikkut immikkoortitsisoqalersaarnerluni? qaqugu? qanorlu inissiat amerlatigisut?

AKISSUT: Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik (IKIIN) ima ilisimatitsivoq: Aasianni Niels Egedep Aqqusernani ilinniartut najugaqarfiisa iluarsanneqarnissaannut aningaasanik immikkoortitsisoqanngilaq. Kisiannili Aasianni ilinniartut najugaqarfissaannut nutaanut suliamik aallartitsisoqarpoq. IKIIN 2017-imi ukiap ingerlanerani taakku qaqugu atorneqalernissaminut piareersinnaanissaat naatsorsuutigineqarnerisut sukumiisumik nalunaaruteqarsinnaalissaaq.

- 6. Ilinniartut najugaqarfii Sisimiuniittut Aqquartaap Aqqusernaniittut barakkitt aningaasanut inatsisikkut immikkoortitsisoqalersaarnerluni? qaqugu? qanorlu inissiat amerlatigisut?**
AKISSUT: Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfik (IKIIN) ilisimatitsivoq:
 Namminersorlutik Oqartussat Sisimiuni Aqquartaap Aqquserngani ilinniartunut inissiaateqanngillat. Kisiannili ilinniartut najugaqarfissaannut nutaanut suliamik aallartitsisoqartoq oqaatigineqarsinnaavoq. IKIIN 2017-imi ukiap ingerlanerani taakku qaqugu atorneqalernissaminut piareersinnaanissaat naatsorsuutigineqarnersut sukumiisumik nalunaaruteqarsinnaalissaaq.
- 7. Siorarsiorfimmuullorsualiassamut putorsualiorsinnaajumaarnermut nunatta karsia aningaasanut inatsisikkut aningaasalersorneqarsinnaanera takorluugaanerluni?**
AKISSUT: Aningaasaqarnermut Akileraartarnermullu Naalackersuisoqarfik ilisimatitsivoq:
 "Naalackersuisut Nunatta Karsia aqqutigalugu siunertamut aningaasaliinissamut pilersaaruteqanngillat, aammattaaq tak. 2018-imut Aningaasanut Inatsisissatut Siunnersuut saqqummiunneqaqqammersoq. Tassunga tunngatillugu ilisimatitsissutigineqarsinnaavoq, Siorarsiorfimmuullorsualiortoqassappat Namminersorlutik Oqartussat aningaasaleeqataanissaannut Kommuneqarfik Sermersuumit qinnuigineqarsimanngimmata."
- 8. Siorarsiorfimmuullorsualiassamut nunatta karsia aningaasanut inatsisikkut nunagissaanermut, kuuffissalersuinikkut aqquserniornissamullu aningaasalersorneqarsinnaanera takorluugaanerluni?**
AKISSUT: Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoqarfik ilisimatitsivoq:
 Sanaartorfissagissaaneq, pisortat kuuffeqarfinnut aqqusersuutaat aamma pisortat aqqusiniutaat pillugit Inatsisartut inatsisaanni nr. 16-imi, 17. november 2010-imeersumi § 6 naapertorlugu kommunalbestyrelsi pisussaavoq, kommunip killeqarfiisa iluanni sanaartorfiusimasuni kuuffinnut pingaarnernut pisortallu aqqusiniutaannut pilersaarusiussalluni. Taamaattumik kuuffeqarfiit aqqusermillu sanaartorneqarnerat kommunit susasaqarfigaat.
- 9. Nukissiuutit kallerup inneruppat aammalumi imermik pilersuisinnaanermi atortorissaarutit atorlugit kiassarsinnaanermik tunngassuteqartunut Siorarsiorfimmuullorsualiassamut nunatta karsia aningaasanut inatsisikkut aningaasalersorneqarsinnaanera takorluugaanerluni?**
AKISSUT: Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoqarfik ilisimatitsivoq:
 Aningaasanut Inatsimmi 2017-imi konto pingarneq 89.71.41 naapertorlugu sanaartorfissagissaanermut 30 mio. koruuninik aningaasaliisoqarpoq, taakkulu illoqarfinni nunaqarfinnilu sumiiffinni ineriartortitsiviusuni nutaani innaallagissamik imermillu pilersuinermi aqqutinik pingaarnernik sanaartorneqarnermut tunngasuupput. Taakkunannga Qinnorpumi sanaartorfissagissaanermut ukiumut 15 mio. koruunit immikkoortinneqarput.
- 10. Nunaqarfimmi Naajaat-ni Upernaviup nunaqarfittaani pinsiarfiliorsinnaanermut tunngasut qanoq pilersaarutigineqarpat?**

AKISSUT: Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik ilisimatitsivoq: 2016-mi KNI A/S-imut nioqutissanik pilersuinermi kiffartuunneqarnissamut isumaqatigiissutip kingulliup atsiorneqarnerani Naalakkersuisut aamma KNI A/S isumaqatigiipput Naajaani nutaamik pisiniarfiliorsinnaanermut periarfissat misissuiffiqineqassasut. KNI A/S-ip pilersuisussaataitanerata annertusineqarnissaanut apeqqummut tunngatillugu aningaasanut inatsimmit aningaasaliissuteqartoqarnissaa pisariaqartinneqartussaavoq.

11. Nunaqarfinnimi allani pisiniarfiliorsinnaanerit imaluunniit toqqorsiviliorsinnaanerit qanoq takorluuiffiqineqarpat?

AKISSUT: Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik ilisimatitsivoq: Pisiniarfinnut quersuarnullu nioqutissanik pilersuisussaataitanermit atorneqartunut aningaasaliisarnertit tamanna pillugu kiffartuussinissamut isumaqatigiissut naapertorlugu KNI A/S-imit isumagineqartussaapput.

12. Nunaqarfiit tunisassiornikkut inuussutissarsiornikkut soorlu aalisarnikkut tunisassiorfiisa inerisarneqarsinnaanerit qanoq takorluuisoqarpa aammalu qanoq tulleriinnilersuisoqarsimava?

AKISSUT: Aalisarnermut Piniarnermullu Naalakkersuisoqarfik ilisimatitsivoq: Aalisarnermut Piniarnermullu Naalakkersuisoqarfiup ingerlatseqatigiiffii Kalaallit Nunaat tamakkingajallugu umiarsuarnik tunitsiviliinissamut akuersissutinik tunisarpai, taakkuli amerlanersaat Kalaallit Nunaata kitaaniittarput. Umiarsuit tunitsiviit pingaartumik qaleralinnik saarullinnillu, kiisalu saniatigut pisarisuukkanik assigiinngitsunik tigooqqaasarput. Ingerlatseqatigiiffiit umiarsuarnik tunitsiviliinissamut akuersissummik tunineqartut aalisakkerivinnik tunitsivinnilluunniit tunisivigineqartartussanik sanaartortuusarput. Kiisalu aamma ingerlatseqatigiiffiit tunisassiorfinnik pioreersunik alliliillutik iluarsaassillutilluunniit suliaqartut akuersissummik tunineqartarput.

13. Nunaqarfinni tunisassiorfinnut aalisakkerivinnut tunineqarsimasut illoqarfinnut ingerlateqqinniartarneri ajornartorsiorfiusarput, soorlumi oqartoqartoq ullut pingasut aalisartut tunisippata tunisisinnaaneq ulluni isikkanilinni matoqqassaaq, assartuinikkut akulikinnerusumik nunaqarfinnut tikittoqartarsinnaanera RAL peqatigalugu takorluuisoqarnerluni?

AKISSUT: Nunaqarfiit nassiussanik sulinneqarnerat pillugu Namminersorlutik Oqartussat aamma Royal Arctic Line-p akornanni kiffartuussinissamut isumaqatigiissuteqartoqarpoq. Nunaqarfiit amerlanerusunik akulikinnerusumilluunniit tikinneqartarnissaat kissaatigineqarpat, kiffartuussinissamut isumaqatigiissummut tassunga aningaasartuutinit ersersinneqassapput. Nunaqarfimmut ataatsimut amerlanerusunulluunniit tikittartut amerlineqassappata, tamanna Aningaasanut Inatsimmi tulleriiaarinikkut pissaaq, ullumikkut tassani aningaasanik immikkoortitsisoqarnikuunngimmat. Tikiffissat tamarmik pitsaanerpaamik sulinneqarnissaannut qulakkeerinissaq Naalakkersuisut eqqumaffigaat, aammalu kiffartuussineq pillugu isumaqatigiissutaareersut ingerlaavartumik naliliiffigisarpat.

14. Meeqqureviliorsinnaanikkut Kullorsuaq Upernaviup nunaqarfittaaniittoq aningaasanut inatsisissakkut 2018-imut periarfissaqarnerluni taamaattoqarsimangippat qaqugumita? nunaqarfimmi inuttusiartuaaginnavippoq.

AKISSUT: Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik ilisimatitsivoq:

Kommunit meeqqureviliortiternermut akisussaasuupput. Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni nr. 16-imi, 3. december 2012-meersumi § 5-imi allassimavoq, meeqqanut suli atualingitsunut tamanut paaqqinnittarfinnik pisariaqartinneqartunik qulakkeerinissaq kommunalbestyrelsip pisussaaffigigaa. Aningaasalersuinissamut tunngatillugu Inatsisartut inatsisaanni § 28-mi aalajangersarneqarpoq, Inatsisartut inatsisaat naapertorlugu ulluunerani paaqqinnittarfinnut, angerlarsimaffinni paaqqinnittarnernut sammisassanullu neqeroorutitut allanut aningaasartuutit kommuninit akilerneqartussaasut, aammalu ulluunerani paaqqinnittarfinnik sanaartornermut Namminersorlutik Oqartussat tapiissuteqarsinnaasut.

Kommunit Aningaasanut Inatsimmi konto 84.40.17 aqqutigalugu meeqqureviqarnermi atorsinnaasat annertusineqarnissaat siunertaralugu sanaartornermi sulianillu annertusititsinermi sanaartornermut akisut 50 %-ii tikillugit tapiiffigineqarnissamik qinnuteqarsinnaapput. Aningaasanut inatsimmi aningaasaanut allassimasunut naleqqiullugu aningaasartuuteqartoqarnerussappat, taakku kommuninit akilerneqassapput. Naalakkersuisut tamanna pillugu qinnuteqaammik Qaasuitsup Kommunianit tigusaqarsimangillat.

15. Nunaqarfiit arlaani timersortarfeeqqamik sanasinnaanermut ukioq 2018-imut aammalu missingersersuiffiusunut 2019 – 2020 – 2021 immikkoortitsisoqalersaarpaat?

AKISSUT: Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik ilisimatitsivoq:

Naalakkersuisut nunaqarfinni assigiinngitsuni timersortarfeeqqamik nutaanik sananissamut 2018-mut Aningaasanut Inatsimmi aningaasanik immikkoortitsinissamut pilersaaruteqanngillat. Timersortarfeeqqamik sanaartorneq kommunit akisussaaffigaa. Taamaallaat 2017-imut Aningaasanut Inatsimmi aningaasanik, timersortarfinnik pioreersunik iluarsaassinissamut tapiissutissanik immikkoortitsisoqarpoq.


**16. Sananeqartussaq imaluunniit sananeqartussat sumi
pilersaarutigineqarpat?**

AKISSUT: Ilinniartitaanermut, Kultureqarnermut, Ilisimatusarnermut
Ilageeqarnermullu Naalakkersuisoqarfik ilisimatitsivoq:

Apeqquut 15-imut akissut takuuk. Timersorneq timigissarnerlu pillugit Inatsisartut
inatsisaanni nr. 15-imi, 6. juni 2016-imeersumi § 15 naapertorlugu kommunit
kommunimi timersornermi timigissartarnermilu neqeroorutinik amerlasuunik
neqerooruteqarsinnaanissamut, aammalu tamatumunnga anguniagassanik
sinaakkutissanillu aalajangersaanissamut pingaarnertut akisussaasuupput.
Taamaattumik timersortarfeeqqanik sanaartornissamut tulleriiarinissaq
kommunalbestyrelsit iluini pisariaqarput.

Neriuppunga qulaani allaqqasuni apeqquutitit akineqartut.

Inussiarnersumik inuulluaqqusillunga



Erik Jensen